

# Dall'antupada tigl luvratori

«Uscheia na pògl betg cuntinuar» – è stada la devisa digls cumegnans an Val Alvra concernent la lavour da giuvenils Alvra. La raschung: Igl salv da giuvenils a Casti – avant la pandemia en li popular – era antiers meis veid. «Aveir ena bun'idea» – è stada la devisa da Noemi Panier, la manadra digl salv – igl «bunker». Ed uscheia ò ella an collaboraziun cuagl Parc Ela lantschea en project da participaziun. Ena viseta aigl li mossa: Aint igl «bunker» è puspe duple veta.

SANDRA BALZER/FMR

L'odour da tagliarigns cun verdura sa mesda cun l'odour en po meffousa da «bunker» e las differentas evaporaziun da giuvenils e giuvenilas pubertantas. Quarter dad els tschaintan ansemen cun Noemi Panier e Sarah Untersander alla meisa da ping pong tg'è neida transfurmada an ena meisa da giantar. Igl è chiet aint igl bunker, igl salv da giuvenils a Casti sot igl tancadi Agrola durant tg'els maglian lour tagliarigns. Excepziunalment pò mintgign tscherner scu alternativa digl liter té sen meisa er ena bavronda soda frestga or dalla frestgera. Cola e té da glatsch en igls favorits.

## Seiras cun 30 giuvenilas e giuvenils

Siva digl onn 2017 tgira igl Nido del Lupo ad Alvagni – an incumbensa e finanzgeida digls cumegnans Albula/Alvra, Barvogn Filisour e Lantsch – la lavour professiunala da giuvenils. Chella duess promover positivamaint igls giuvenils e las giuvenilas an lour svilup. Noemi Panier, tgi magna igl «bunker» a Casti siva digl onn 2018, sa regorda agls «taimps glorios» digl salv: «Ia veva venderde seira cun anfignen 30 giuvenilas e giuvenils aint igl bunker. Nous vagn cuschino, do a ping pong etc.» Cun corona è chegl sa mido: Igl domber visitadas e visitaders è scumanzo a sa redutgier adegna duple. «Ed igl onn passo ègl do antiers meis sainza visitaders.» Davart las raschungs saptga ella angal specular: oters hobis aint igl taimp liber, igl lung viadi cugls meds publics anfignen Casti. «An minga cass on igls cumegnans detg, tgi uscheia na pussigl betg cuntinuar. Ed alloura vaia gia dad aveir ena bun'idea.»

Igl giantar è per antant tuagea e siva d'aveir lavo giu communablamaint tschainta Noemi Panier cun Mara, Vitalii, Olivia ed Aline puspe alla meisa da ping pong – ossa transfurmada an ena meisa da seduta. Sarah Untersander beama alla pare igl concept digl «cunsegl da scolaras e scolaras» – elaboro durant las davosas sedutas – e chel vign anc eneda discuto. «Tgi è alloura aint igl comite d'elecziun?», è egna dallas unicas dumondas ainten la runda digls giuvenils. La seduta dad oz è pitost stentousa, igl concept para d'esser fatg, i resta chiet. Oz para igl sustign da Noemi Panier e Sarah Untersander per coordinar igls davos detags d'esser tant pi dumando.

## Collaboraziun cun Parc Ela

Dall'antupada da pi bod tigl luvratori da projects: La viseta aint igl «bunker» dat perdetga, tgi la lavour da giuvenils an Val Alvra è sa mido igl davos onn. Igl concept pigl «cunsegl da scolaras e scolaras» tgi ena gruppa da totalmoint nov giuvenilas e giuvenils less instradar ainten scola è egn



Siva digl onn 2017 exista la lavour da giuvenils Alvra – finanzgeida digls cumegnans Albula/Alvra, Barvogn Filisour e Lantsch. Igl «bunker» – pia igl li d'antupada digls giuvenils e las giuvenilas – sa catta a Casti sot igl tancadi Agrola.



La stanza LED tgi sa catta davosvart igl salv principal è fitg populara.

digls projects. Noemi Panier daclera: «Cun esser sto basigns d'ager igl onn passo vaia contacto Sarah Untersander digl Parc Ela.» E cuncheigl tgi lez ò er l'incumbensa da s'angascher pigls basigns digls unfants e giuvenils aint igl parc è chegl sto en «clom d'ageid» agl dretg li.

Sarah Untersander e Noemi Panier on alloura lantschea en'enquista online per la 5 anfignen 9avla classa ainten la Val Alvra per erueir igls basigns. E cun igls resultats dall'enquista seian ellas eidas ainten scola e vegian lantschea en project da participaziun. Igl «cunsegl da scolaras e scolaras» è siva da tschintg occurrenzas scu seiras da kino ainten las vischnancas u dus discos da scolaras e scolaras cun totalmoint 149 participantas e participants en ulteriour project. «Nous sustign igls giuvenils interessos da realisar lour projects – sen basa da lour basigns. Chegl ò alloura li aint igl taimp liber, numnadamaint la mesemda sivamezde.»

## Puspe duple veta

La seduta dad oz è anc adegna stentousa, novs inputs mantgan. Igl quatter giuvenils paran d'aveir ansemen lour concept ed igl proxim pass tgi suonda vign ad esser l'occurrenza d'infurmaziun ainten scola all'antschatta digl proxim onn da scola noua tgi igl cunsegl digls scolaras e las scolaras vign preschento a tots.

Adegna puspe sa derva la porta digl bunker, giuvenilas e giuvenils – er dalla 5 e 6avla classa – aintran e sortan. «Nous giagn pigl colleg», cloma egn. «Pero betg cuagl töfli, chegl è illegal», rasponda tschel.

Siva digl november 2023 è igl «bunker» er davert pigls unfants dalla 5 e 6avla classa. «Igl è ossa lavour d'unfants e giuvenils», dei Noemi Panier. Ossa seia puspe duple veta aint igl «bunker», schi er an en'otra furma tgi igl «treff» da pi bod e chegl aglmanc la mesemda sivamezde. Igl venderde resta'l saro.



Communablamaint on Noemi Panier (san.) e Sarah Untersander lantschea igl project da participaziun. Ellas sustignan igls giuvenils e las giuvenilas tar lour projects.

FOTOS SANDRA BALZER



Giuvenilas e giuvenils durant lour seduta pigl project «cunsegl da scolaras e scolaras».

## Mengia pacas purscheidas per unfants e giuvenils

Igl concept è cumplet – la seduta terminada. Ossa suonda la part pi patgifica. Igl egn sa scontran ainten la stanza blava LED, tschels sen la pultrunga aint igl salv principal. Uscheia er Mara da Lantsch. Ella vigna savens a cò, i seia en li pigls giuvenils per piglier distanza da bleras tgosas a tgesa, ena sort «refugi». Ella è egna dallas giuvenilas tgi sa participescha gio agl quart project e tgi planisescha – sper igl cunsegl da scolaras e scolaras – er ena festa da stad u ena mottoparti, chegl seia anc an planisaziun.

Sies angaschi daclera ella uscheia: «Siva d'esser sto treis gedas aint igl bogn a Lai ins na so betg ple tge far. I fess bel, schi dess duple purscheidas pigl taimp liber per unfants e giuvenils ainten la Val Alvra.»

Cun mussar igl davos rapport annual seian igls mastrals da Lantsch ed Albula/Alvra sa mussos fitg cuntaints e vegian detg: «Anavant uscheia», dei Noemi Panier cun en reir. Ed er ella seia ossa puspe pi mutivada.

«Igl giovens èn fitg angratzgevels da pudeir far chels projects ed i mossa, tgi lavour da giuvenils sa meida, adegna sen basa digls giaveischs e basigns. E schi angal egn da chels tschainta pi tard ainten supranza communal, alloura vainsa ple tgi contanschia la nosa fegnemeira», dei ella cun en reir.

## Mara (14), Lantsch

«Ia vign gugent a cò percheigl tg'igls mies ameis abiteschan aint igl cuntorn e cuncheigl tg'ia abitesch a Lantsch ègl per me pi simpel sch'ia reiv no cò tgi els tar me. Igl bunker è en li tg'ins pò esser giuvenil, tadlar dad ot musica e tuttegna en li tgod, er sch'igl è da sa cumportar. A me plaian las differentas stanzas tgi porschan differentas pussebladas scu vurdar televisiun, dar gis, discorrer privat, tadlar musica u dar a ping pong. I fess bel schi nissan duple giuvenils, ma chegl è difficil.»



## Aline (13), Lantsch

«Ia sung cò per far ensatge per la scola scu e per exampel organisar igl cunsegl da scolaras e scolaras ed esser ansemen cun collegs. A me plai da collaborar, organisar e discutar cun la lavour da giuvenils tge tg'ins less midar.»



## Olivia (13), Lantsch

«Las mias collegas èn er a cò, ia sung gugent cò ed ia cat cool da planisar projects. Igl è cool tgi dat schi differentas stanzas ed er Noemi e Sara èn coolas. Ins so baitar bagn cun ellas ed igl è legher.»



## Noah (12), Brinzauls

«Ia sung cò prest mintg'emma, percheigl tgi cò ins pò esser ansemen an ena gruppa da tschintg u duple ed a tgesa vess la mamma crei betg schi plascheir. Savens ischans davos ainten la stanza LED e discurrign ansemen.»



## Vitalii (14), Lantsch

«Gio an l'Ucraina sunga ia aint igl salv da giuvenils. Ia sung gugent ansemen cun otras persungas, i fò plascheir da far parti u simplamaint tschantar ansemen, reir, saltar, cantar u magler. Igl è en bung team ed igl n'è betg schi strantg ed i vign betg prescretg tge vistgadeira tg'ins ò da trer aint.»

